

Prin apontament ai 23 di Zenâr pe rassegne invernâl dai Colonos, che chest an a butin un voli su chei che a fevelin fûr dal côr.

» DI CHRISTIAN ROMANINI



Pre Roman Michelot

In File par fevelâ di eresie

La eresie come element che al torne te storie. Cun chest spirt "I colonos" a presentin il program di "In File 2015", la rassegne invernâl de associazion culturâl vuicide di **Federico Rossi**.

Il prin apontament al sarà vinaris ai 23 di Zenâr aes vot e mieze di sere cu conference dedicate a pre **Antoni Beline**, cussience libare e critiche, dispès contestât de jerarchie ecclesiastiche. Al fevelarà di lui pre **Roman Michelot**, che cun pre Beline al à condividût grande amicizie e tantis bataiis.

Eretic, no isal un agjetif fûr lûc par pre Antoni?

"Te acezion che nô par solit i intindin, riferintlu a pre Antoni jo lu consideri un agjetif no coret, parcè che lui al è stât un predi di grande fedeltât al Vanzeli, ae glesie, al popul. Salacor la jerarchie, cualchi predi e catolic nostalgjics a podevin considerâlu eretic, parcè che al cirive di doprâ il cjâf. Ma lui al jere masse inteligent par vendi il cjâf a cualsisedi strutture ancje la plui sante".

Alore dulà ise cheste sô eresie?

"Plui di cualchi predi, ancje in alt, al varès spietât che pre Antoni al saltàs fûr de istituzion parcè che nol jere in linie cul sisteme conven-

zionâl e colaudât, cu la strutture che e deve sigurece e che e faseve sintîsi a puest, in regule. Lui al pensave che la fede cence dubis e fos une fede muarte, o adiriture pericolose. E chest al faseve pôre a plui di cualchidun".

Trop pativial par chest?

"La sô vite no je stade facile. Baste pensâ ai siei malans fisics che lu àn compagnât cuasi dute la vite di predi. Ma chest al è stât pocje robe rispjet a ce che al à patît moralmentri, aes incompressions continuis. La jerarchie e je stade simpri pronte a fâi i conts cuant che al scantinave, no lu à mai valorizât in ce che di bon al veve produsût. Al diseve: 'No vorès vè un mestri che mi met zero cuant che o sbalgji e no mi met 10 cuant che o fâs just!'".

Cuâl isal vuê il rapuart di Glesie furlane cu la jerarchie ecclesiastiche?

"O cirin di puartâ indenant chês liniis che a son stadis di une lungje tradizion nostrane e che a àn cjatât in pre Checo e pre Antoni i grancj lusôrs dal ultin mieç secul: stâ cu la int, presentâ e vivi une religion e une fede incjarnadis in cheste realtât furlane. Il nestri rapuart cu la jerarchie, par chel che nus rivuarde, lu vivin in maniere serene. Di agns o colaborin a nivel diocesano. O vin lavorât pe traduzion dal messâl, rivade insom in spiete de aprovazion uficiâl e cumò o sin impegnâts te traduzion dai tescj liturgjics".

Par plui informazions su In File 2015 e su lis ativitâts de associazion, si pues visitâ il sît www.colonos.it.



ilfriuli@ilfriuli.it

■ UNE MAN AL ATENEU

La Provincia di Udin e sosten la Universitât

La Provincia di Udin e conferme la sô poie ae ativitât dal ateneu furlan. Pal an academic 2014-2015, palaç Belgrât al à metût a disposizion de Universitât 90mîl euro. La cuote, su la fonde di un protocol di intese, e finanzia diviers interventis a scomençâ de realizazion di un data base cul elenc dai coregjonâi che a vivin tal forest.

Un strument che, une volte a regjim, al permetarà di facilitâ e aumentâ i tirocinis dai students de Universitât tai varis Paîs dulà che i furlans a son presints e atîfs tal mont economic. "O sin entusiascj di podê sostignî chest progjet che al vierzarà ai students oportunitâts gnovis e impuartantis dal pont di viste formatif ma ancje di cressite personâl e professionâl" al spieghes il president de Provincie di Udin **Pietro Fontanini che al è intervignût ae cerimonie di viertidure dal an academic dulà che al jere presint ancje l'assessor provinciâl ae Istruzion **Beppino Govetto**.**

SCOLTADIS DI DRIUS

Propit brute

Gno copari a l'â cjatât une morose cussì brute che i moscjins, prime di becâl, e siarin i voi.





SMS: 393 00 90700
 diretta@radiofantasy.it
 TEL. +39 0431 30022

la radio tra la gente

UDINE VENETO ORIENTALE	FM 90.700	GORIZIA	FM 89.100
PORDENONE	FM 95.800	TRIESTE	FM 89.100
		PAULARO	FM 107.700
		TOLMEZZO	FM 101.600

www.radiofantasy.it